

朝省積有歲年夙夜在公練達政體又廉訪得濟南府總管趙炳蒞政以來民安盜息強幹著稱及吏部侍郎王椅通僮才能和而有守既掌銓衡又稱公當論其才品俱各相應如任以監司必能振舉綱維不負輿望據此合行舉呈

論順天清苑縣尉石昌璞繫獄事狀

切見隨路州縣官如縣尉人員職小責重最為不易其合捕盜賊有任終不獲至經年累月停罰俸給者幸有一二強幹肅清所部宜加遷賞以勵其餘或事有罣悞情實可恕今體訪得順天路清苑縣尉石昌璞強幹有為巡捕得法察賊推情遂破窟穴自到任以來甫及一年擒捕強竊及印造偽鈔知名劇賊郝

榮楊留兒等凡一十七起計賊黨九十八名俱係積年作過流毒數州所在官府皆不能制所謂不待教而誅者也致使保州方數百里間道途清寧稱頌在路誠消弭安靜巡捕之最者也今止為郝榮等事被問到部本部即行枷收同重囚繫獄實為未當恭詳據已結案強賊郝榮等反獄殺人情理深重舊例劫死囚殺人者無首從皆處絞斬彼郝榮拘執死囚已成得劫况石昌璞依奉府命摧拉凶威悞有折傷因之損死度其情節誠可恕原蓋公心除害之理多私計故殺之意無據所犯設若抵罪理合照依舊例量情施行似為相應兼本官前後敗獲罪數合得未給賞賚甚多將功贖過亦不至此不然恐當斯職者遠

近聞之因以解體使賊輩潛知幸快禍心且長其剽
劫侵牟之勢深為未便據此合行申理

至元八年六月初三日
尚書省陳叔詒

論隨路交鈔庫令總官府提點事狀

夫時有通塞事貴改更故古人因時制宜不拘常法
而憚變更也切見隨路鈔庫行用元寶鈔數多者三
五千定少者不下二三千定每歲差設庫官止憑一
二保官即聽注擬近年以來如失陷去處雖監督正
人及着落元保領管陪納數足至經涉數年往往有
破家不能結絕圓備者兼保官多不親即故出於一
時面分又何嘗計保者家產之虛實錢穀之果能通
曉也方今鈔法極是通快但委用非人稍有侵陷便
是一路鈔法因人為累少有滯足滋長奸弊與其

治於已然無可耐之後何若防於未然易為力之前
愚見今後合無公同選舉其抵業信實委通錢穀人
員勾當就令本路總管府官每月以次計點見在提
押赤曆其府官却不得因而恃勢借貸官錢違者許
庫司申覆上司照驗如此使朝夕得相臨視上下通
互關防官無失陷之虞人遠奸欺之弊照中統元年
以來已曾依上施行至甚便當今各庫雖按月赴提
舉司申報單狀赤曆於關防實無所係蓋非切近臨
視中間作弊既無畏避又不能即時知覺究治是申
押本司徒常例虛行而已據此合行舉呈伏乞照詳
定奪施行

論待闕官預為照會各處事狀

切見省部將隨路守闕官員不計月日遠近受除後
即行下各路照會曰某年月日某代某甚者至於預
往任所守待要結所在風俗凋敝致一方吏民將舊
官輕視滅裂或督責所行則曰汝計日去官耳見任
者既為齟齬不苟且保祿為心以俟其去者幾何人
斯如此是官府吏民上下離合且使無事猶云不可
况軍民宣課工匠一切事務今皆取辦州縣中間脫
有失悞利害所關非輕今後合無除將守闕人員令
祇受還家聽候外省部驗赴任月日既近然後照會
各路似為未晚能然庶幾官民去留之際兩得安便
不致上下苟且耽悞一切事務深為便當據此合行
舉呈

論外任官展裹公服事狀

切念古人制作冠服蓋所以別上下立尊嚴也今者
隨朝百官與隨路管民官上自宰相總府官下至簿
尉其品從散官俸祿公田子孫廕叙等事畧皆備具
獨公服展裹之禮未見施行合無照依舊例使各官
自備冠服公廳展裹事理如此不惟見

國家禮文有漸其於官府威儀實為尊崇

論撫勞襄陽軍士事奏狀

切惟古之用人能盡力忘死者不過下通物情憫其
勞苦說以使令而已兼兵以氣為主所貴感發振作
不致有懈怠惰歸之意成役雖久事功可成伏見襄
陽之役以十萬衆頓堅城之下經今四年暑天災瘴

攻守暴露不戰而疫死者無日無之即目已屬炎瘴
江水向發設如去歲夏宋人復以舟師來援內以窮
寇必出相應其利害所關非輕當此正帥臣籌畫之
秋將士竭忠之時也今省官雖節制於上
朝廷固宜特與撫勞感發人心振作士氣以愾所敵
此以夜戰聲相同晝戰目相見之意也以某愚見合
無聞奏選差近侍信臣奉將

恩命詣彼軍前宣諭撫慰使功過兩明賞罰必信然
後序其情而憫其勞使三軍之士僉曰我之生死有
所歸矣我之勤苦為上知矣既喜如此雖以歲月置
之重地人將奮發忠義心力一彈勇氣自倍而親上
死長以為當然所謂悅以使民民忘其死且使煩暑

可變為清涼矣兼襄陽窮寇料其時勢日就困蹙似
宜重懸賞格射書城中論以禍福有能擒致主帥或
番城出降者授以其官某賞至于軍校預謀有功各
以次論授外據老弱疾疫軍人既非精壯可用復使
疫氣蒸染又為未便有無分揀暫還休養如此則人
有所望去留兩安故兵法云視卒如子可與俱死兼
丞相史公去歲已曾如此施行師律軍心兩實貞順
以時勢觀之據上項事理恐亦是一法伏乞御史臺
照詳聞奏施行

論宣課折納米粟實常平倉狀

切見隨路起蓋常平倉廩二千餘間已是功畢今年
豐收見得官為和糴以實廩庾然有未便者如近年

上都中興西京等處和糶糧斛所委官吏往往作弊
官錢既為欺隱糧斛又不敷足隨復差輟省部官打
算追徵經隔數年不能結絕不惟官司素煩公家急
無所濟體訪得去歲

尚書省為山東道軍缺乏糧儲將附近州郡課程折
納米粟接濟甚是便益合無照依已行事理趁夏麥
收成及向前秋收將農民六色課程約量折納粟豆
等物公私實為兩便免致有欺隱素煩之弊據此合
行舉呈

論州縣官經斷罰事狀

切惟禮義廉恥國之四維諺又云無瑕者可以戮人
今切見仕途之間廉恥道喪賦濫公行自立部以來

州縣百官往往賦濫不公經值斷罰者每選不下數
人例皆遷叙不過降等邊遠而已恭詳爵祿者礪世
磨鈍之具據見行降遠格例係亡金敝法固非懲惡
勸善之道似不足取兼州縣字民之官務要宣明教
化禮義興行乃所任責彼身經斷罰處民之上豈惟
內懷慙德先不自安部內之民將化服何欲望四善
具五事備難矣照得唐例職官任終驗所犯輕重有
數年停勒之法合無依倣定奪如賦濫不公罪應罰
俸至幾貫以上及經斷及若干者今後盡行停殿庶
幾懲一勸百遠去甚者不致敗羣使士興廉恥之風
俗被肅清之化四維張皇內外之職修矣

秋澗先生大全文集卷第八十九



秋澗先生大全文集卷第九十

便民三十五事

自此係監司時建

白

皇帝聖旨裏中議大夫治書侍御史行御史臺事伏見朝廷勵精為治百度從新中外顛顛有太平之望然弊積日久事端非一必更張其大者重者使有定制則實惠可及於民今

國家疆宇民數遠過漢唐歲入經費又為不貲所急者立法選官恤民息兵力養人材節浮費之用停不急之務而已蓋大法立則宏綱振庶官舉則萬務修兵民安則邦本固人材廣則任使周省費用則百姓足停不急則農務勸至於侵奪民利不便於時者一切革去之然此要須大臣力任其責



以經國遠圖為念使治體一定始終無間開誠心
布公道授羣材而作行之使上有所守而不勞下
知奉行而不亂尚虞箝勒未嚴吏有勤惰明其賞
罰黜陟以威厲其不事事者將見激昂奮發人爭
立效則治定功成可計日而待也不然究錢穀之
已然緩綱維之大柄未見其可也某以不材謬當
言責區區之誠有不能自己者謹條陳切時便民
三十五事開列于後伏乞

御史臺備呈

中書省照詳施行

事目

立法

置發兵符契

定法制

通行奏事

選官

議保舉

立審官院

選叅佐

卹民

議卹民

除軍戶拋下差發

採災

秋稅準喂養馬駝草料

復常平倉

論匠戶

括戶土斷

七品以上官言任內利病事

息兵力

軍人交番

合併十一年軍 三

緩遠征 二

定奪析居地稅

養人材

設學校

用試中儒士

試吏員

節費用

古者因官府而立人
今則因人而立官府

併州縣省官吏

行券法減稅應

禁醞酒

振武屯田

輸粟充監當官

停不急務

權停一切工役

省罷鐵冶戶

侵奪民利不便等事

課程再不添額 論鈔法

論鹽法

輝竹還民

分間官占民田 二

定奪官地給民

禁約騷擾百姓 五

立法

定法制

自古圖治之君必立一定之法君操於上永作成
憲吏行於下視為準式民知其法使之易避而難
犯若周之三典漢之九章一定不易故刑罰省而
治道成今

國家有天下六十餘年大小之法尚遠定議內而
憲臺

天子之執法外而廉訪州郡之刑司也是有司理之

官而闕所守之法至平刑議獄旋旋為理不免有酌量準擬之差彼此重輕之異合無將奉敕刪定到律令頒為至元新法使天下更始永為成憲豈不盛哉若中間或有不通行者取國朝札撒如金制別定敕條如近年以來審斷一切姦盜

省部略有條格者州縣擬行特為安便此法令當至定之明驗也如此則法無二門輕重當罪吏無以高下其手天下幸甚

置發兵符契

竊見

朝廷防馬劄妄濫也

御前給發奉使欲遠方取信也佩圓符為徵况兵戎大事乎近者王著矯偽發兵利害非細合議關防契勘歷代緩急調遣兵馬皆驗符契然後得發今後合無依上起置符契庶免臨時別致事端

通行奏事

竊見

憲臺初立遇有軍國重事

中書省臺院約會一同

聞奏若事或不便許廷議以從所長其於

朝廷大為有益近年稍乖舊制至於大政大刑其事已行不得與聞任言責者既不及論救且得箝口不職之謗于天下乞請申明舊例不致似前濶畧以絕

壅蔽天下蒙幸

選官

議保舉

夫親民之官守令為急切惟選法自近年大壞後府州司縣官例多阿權通賄僥倖而得其南選尤濫至目之曰海放此等賢否不較可知庸懦者因循苟且奔走承奉外政務盡廢小材者視時所尚營治已私略不以官事為念爰自新政以來外望雖聳根源舊弊依前未除易舊而新今雖汰冗濫選材能然一或譽之則為賢一或毀之則為否是非惑亂終無所憑莫若將素有聲迹資品實至者令三品官入狀舉保量短長之材授小大之任然後明察臧否精覈殿最

得人者行進賢之賞謬舉者坐不當之罰舉官自然精詳受保者惟恐有累如此則官得其人庶事修舉昔周世宗令除目仍署舉者姓名若貪穢敗官並當連坐亡金正大間亦行此法當時號稱得人方今教養無素科舉未行權宜矯弊似為良法

立審官院

竊詳省院臺部皆得選署官屬若公當則人心自服稍或未安中外之人皆得指言數年以來省臺壞亂多此之由夫省臺大僚近君之重臣也古人稱投鼠忌器當尚深戒况天官天秩一旦使羣小得恣情阻壞非所以體重臣而存大體也兼若輩處心鮮公不為己私且泄怨謗叱叱若

此合無立審官院選用有德望公正大臣次取知典故識大體別直而敢言者為之輔其中外一切選舉官員通得論列而疏駁之不猶愈于若此紛紜之不定也耶檢會得亡金章宗時臺司用一諸科人為監察審官院竟奏而罷之致臺望增重遠近肅然當時大為有益或曰若立此官臺諫何為曰臺諫論列至廣審官係封駁之事古人設立以用人為為治之本惟其責之專則事精詳而得實理所謂開公道而庶人不私議也伏乞熟慮而深思之

選叅佐

近聞

朝省選用隨路總管其法甚妙然叅佐尤當精折所

謂掌司經歷者務要識大體有議論通案牘臨事不疑剛正有斷振一路之紀綱辦大小之衆務下至調和官府驅役吏人上下伏從官長有賴方為稱職近年往往用非其人不能誤事且復害事如非流望者有之不通文墨者有之老病庸懦不勝任者有之如得其人斯弊盡絕契勘至元二年隨路總管許令帶行叅佐二員此固唐自辟所知良法令既妙選大尹亦宜令各官保所知職官以任叅佐却恐朋黨成風因時作弊莫若將保到人員交相為用如真定府人所保用之保定保定所保用之他路之類是也若本人任內污濫不職保官亦行坐罪其各道按察司首領官亦當依上精選使出總府幕職之右庶幾官吏

推服 臺綱人望因之取重

卹民

議卹民

竊見隨路百姓自攻取襄樊以來節次將中強等戶簽克軍站其見在下戶供給百色軍需已是生受及江南平定中外佇望庶得休息復致前政煩苛橫取白著急於星火州縣官吏視其如此因緣作弊科歛無度如遇和雇和買夫役等事即驗包銀分依每一兩週歲約出橫泛錢三十餘貫止以四兩戶論之是一歲着二十倍也又軍戶逃戶閃下差稅復灑見戶包納割剝民肌未見如此之甚致愁嘆不絕感傷和氣歲旱不收百物湧貴衣食艱難民安得不困救之

之方在於將和雇和買必不可闕者畫時支價兩平
和買雇賃並不科徭民間飢荒去處官為賑濟累年
逋負已徵入官者還民未徵者盡免其逃亡復業者
付元拋事產量免三年差役庶居者安集而去者思
還然後下寬大之

詔布告中外使民曉然知

朝廷優卹元元本意又聞阿合馬及其黨與所沒贓
賄不可勝計此物既非天來皆係生民膏血向肆威
虐聚為己私可謂賊穢不祥之物昔漢籍梁莫家財
遂克國用減天下租賦之半散其苑囿使業窮民合
無亦將上項財賄全代天下今歲租賦之數使二十
年愁怨之苦一旦消釋誠 國家結民心感和氣

曠蕩希世之恩過於尋常萬萬也

一照得近年和買造作等事其弊有三如立限甚促晝時不支價錢必須科派民間然後可辦致百姓添價轉買或官吏搭攬多搭錢數及取納使用糜費等錢上下通同作弊一也縱降到價錢止依各處虛報時估比之百姓實費不及半價虧損人戶二也其官降不敷價錢內官吏又行尅減且有全不到民或三五年間並不給降者三也如近日科下真定皮裘皮袴明該不得椿派百姓官無見錢官無見錢皮無見在送納有程却恐耽誤不免分科民間其弊依然復作是上司實有愛民之心而百姓名受其惠而隱

受其虐也今欲革弊不過降給見錢從實支價責委正官辦集其事何則蓋近年遇有工役官長但領略其間率委本把里正信實等人營辦將百姓恣行侵牟無有紀極或事發到官止將上項人量情追斷民苦已受將何所補若革去三弊將一切違錯明該止坐正官不究餘者庶幾多方用心顧卹百姓不致里正諸人作弊一隨路遞運車仗脚錢近者五六十貫遠者不下百貫官支價錢十不及二三其不敷數百姓盡行賠備名為和雇其實分着年來披擔極是生受乞請驛丞去處官立車甲頭兩平雇覓從實支價以行民力

一戊戌年中選儒戶比之僧道百分無一前省收
入民編却有告難蠲除者合無依舊除免併十
三年試中儒人亦行一體定奪

一弛山林河泊材木魚蒲之禁令民得恣採取以
裨飢乏不足

蠲免軍戶閔下差發

爰自收復殘宋以來人皆有息肩之望近年差役
豈惟不蒙減免又將九年十一年內元簽軍戶差發
每戶止除四兩餘有數目俱於現在戶內椿科及自
戊午年准申逃戶之後續逃戶計上司並不准申州
縣亦不敢申報閔下差發仍令見在戶計包納又至
元七年取勘出協濟戶計元奉

條畫止令協濟見當差戶近年編造入額另行科差
加以和雇和買不絕如流比之初取襄樊差役轉增
數倍上司若不哀矜量加優恤恐不免轉徙流離之
患乞將元簽軍戶氣力全行除豁及取勘續逃戶計
蠲免分數庶望貧民少得休息實為便益

棟災

竊見今歲真定等處春夏亢旱穀菜皆無米價踴貴
小民久已闕食往往採食青棘槐花榆葉拂子等根
加之流竄驚擾甚為不安諺云春旱泥倉秋旱離鄉
蓋言此接新來歲月日遠故也百姓多趨熟河南今
無米粟亦貴亦無所往是將坐視飢饉以待其斃其
救之之術宜在於早設不然不過發倉廩散楮幣倉

廩所在皆空寶鈔幾許得濟莫若將被災州縣合納
稅石併即今收糴事故等糧盡行倚免使百姓少寬
且得自救責委按察司親臨官吏多方置計賑濟飢
乏及弛山林河泊之禁權停門攤酒醋等課庶幾不
致流亡失所

秋稅准喂養馬駝草料

竊見保定等路百姓每歲撥赴遠倉送納又椿配各
和買各位下馬駝所用草粟設立倉場官收支中間
官吏作弊百姓重併生受如按察司每歲各處追首
鈔使民免遠倉納稅之勞有三五百定者盡係添搭
多取于民若於百姓所納秋稅內盡行折作草粟赴
各處喂養馬駝倉場送納使民免遠倉納稅之勞無

和買椿配之擾及革去給降尅減之弊實為便益

復常平倉

竊見至元八年設立常平倉驗隨路戶數收貯米粟
約八十萬石以備緩急接濟支用近年以來起運盡
絕甚非

朝廷卹民採荒本意如往年差官定奪時估以平物
價縱使能行終非久遠通便之法當時僉謂若常平
有粟各路不過依時價出糴三五千石則物價自平
人心倚安低昂權在有司兼併不復高下其手向前
收成去處依前收糴以實常平恐亦恤民平估之一
策也

論匠戶

一省部為各處富強之民往往投克人匠影占差役以致靠損貧難戶計奏奉

聖旨差官與察司總府一同磨勘到各戶根脚氣力手狀已是精當類攢冊帳各路赴部分間實為善政中外喜望比及今歲科差必得上項富戶依應當差庶幾貧難稍得息肩近聞省部止為外路帳冊體式與大都不同此上差官復同三家再行磨問不惟中間動搖實恐遷延有失人望若將已分間定帳冊勒令各路照依大都體式攢報以望善政早得成就或謂若依已行體例將匠戶富強者還民當差其見當身役止除一丁差稅却恐一家兩役日久靠損人難終致紛紜不定莫若將見行分見匠戶委係高手

人匠存者存之外據戶眼高手藝平常者放罷為民若必須補添再於民間將酌中戶內取手藝極高者克庶免紛紜不定且失民望其江南戶口一家分作數戶其名甚多其數不實

括戶土斷

國家自壬子歲抄數後迄今未嘗通檢中間等第高下大成偏重故唐制三載一定戶每歲一團貌恐因仍舊額貧者轉貧富者愈富况三十年之久稍候年歲豐收民大安息合行從實檢括察其存亡均其貧富則庶功以興國富家足不然是縱令州縣每歲增減高下以滋官吏之弊故前人云與其濬資于姦吏何若均助于疲人以免其偏苦哉其各路流徙戶計

拋下差賦即今盡行椿洒見戶賠納往往靠損人難
今四海一家民之去此即為逋逃寓彼即為見在若
通行括數只令彼處土著當差除此之逃額實為便
當此歷代遺制我如行之不為無例或曰恐涉動搖
曾不思偏重包納不均之苦甚於一動多矣

七品以上官言任內利病

竊詳方今大病

國之惠化下罔盡行民之情偽

上不周知今後合無令外路五品官部內利病可以
興除者許令任內或秩滿赴部直言要以指陳實事
一出已見庶使民間疾苦艱難悉得

上聞其官之盡心與否不校可知其當興除者即論

所司施行日新政治誠表裏相維上下盡心之良法也

息兵力

征防軍交番

一隨路軍人爰自南征以來攻城野戰萬死一生及
平定江南舉望停征稍得休息今軍前勾起逃亡事
故等軍歲無虛月如父死子繼兄亡弟行以至一戶
有病殍陣亡父子兄弟四五丁者又有死絕止存老
父母與妻孥者尚然不蒙撫存况征南將校例多遷
賞其軍士合無將見屯戍軍士亦宜優卹或二年或
三年使之分番相代省家父母親戚歲時有相會之
樂所謂悅以使民民忘其死契勘唐制征防軍年及
者還民父母八十者聽一子歸侍况今四海一家正

息馬論道之秋如兵戎稍寢天下幸甚

緩遠征

伏見方今

聖德天覆海宇一家獨以日本未霑

王化致煩征討竊詳倭奴自後漢始通中國多以義懷來未聞專事征罰蓋限隔洋海數千里之遠此與彼接我以衆命先嘗其險嗚呼殆哉昔三苗來格虞帝以修文為先彼倭始通光武以廣德為務伏望聖朝鑒法前代先遣材辯綏遠之臣申之以文告喻之以逆順柔以文德結以恩信使民見包荒不遐遺之意若猶未至然後興師未為晚也此係國家大事任責者宜悉心以明其利害

合併十一年軍

竊見近年

朝廷將舊軍與至元九年所簽軍資難消乏之家皆行合併甚為便益其十一年所簽軍人當時已是近下戶計經今九年多有生受不堪役者合無一體從實合併使貧富難易兩得均平又得兵力精強且見國家同仁一視之義

定奪軍戶析居地稅

一軍戶析居貼戶即日見行取要地稅當間本是一戶謂如有田六頃除四頃外納餘上稅石既是析居其地兩分各有地三頃不在合納之數即日止憑一戶時取要餘上地稅理合分間定奪除免

養人材

設學校

夫自昔設立學校非唯尊師重道蓋欲養育人材以備內外任使方今名儒碩德既老且盡晚生後輩以上乏教育下無進望例皆不學而吾道不絕如綫設若構一大厦必用衆材可成况治天下之廣居乎今府州縣道雖設立教官講書會課止是虛名皆無實效其隨處教官名實學黷餉口不給矣暇治禮義而及人若與醫學一體給降俸祿復官撥學地資贍生理然後選職官子弟及鄉民之秀異者使之入學專以講明經史以趨有用實學不三五年間一處止有成材五七人則天下可得數百人以須

國家之用豈不偉哉如以後設立科舉尤須預先教養不然將見數年之後非惟無材可取則禮義廉恥掃地矣將何以論治乎隨路醫學亦合一體整理施行不致虛請俸錢有名無實

議復立國子學

一竊見至元七年

朝廷立國子學命許衡為祭酒選

朝右貴近子弟令教授之不滿五歲其諸生俱能通經達理彬彬然為文學之士及其入仕皆明敏通疏果于從政如子諒侍儀之正大子金中丞之剛直康提刑之仕優進學弟親臣之經明行修堅童君永之識事機子亨待制之善書學企中客省之貞幹揚歷

省臺藪為

國用豈小補哉必欲設學校養人材京師首善之地
宜先立復

國學以風勵天下

用中選儒士

竊見十三年隨路試中儒人於內多有材堪從政者
若委自各路并按察司取勘相驗得實申報
上司遇 臺院六部百司按察司令史書史闕員以
憑補充勾當是猶勝謬亂雜取州縣無例無學等人
此輩設若吏業非素終是通曉義理例有文筆使官
事稍習皆可勝用假令學校吏試便行須待歲月猝
急不能得用能此不但捷於得人亦是激厲天下為

學之方豈為小補兼亡金舊例臺掾書史皆於中場
舉人內試補勾當但在有司持擇使之精當不致妄
濫請托而已

試吏員

竊見方今內而

省部臺院百司外而按察司府州司縣合用吏員俱
出自州縣校書貼寫等人因而上達以致僥倖成風
廉耻掃地只以學術無素選取無方中間求其廉慎
可稱熟練吏事者甚鮮而天下之務繁而詞訟錢穀
重而刑名銓選生死曲直高下與奪悉出於乳臭若
輩之手欲望治道清明風俗美好難矣合無講究近
代考試法試從府州官公共保舉其法律刀筆行止

或不相應罪及保官其餘非此而進者不許補充隨朝勾當設法既嚴人自力學如此非惟用得群材禮義廉耻風動四方下可以革去僥倖苟且之人上可以成公平肅清之化端本澄源此最急務

併州縣省官吏

此條節費用內

伏見方今州而為府縣而作州復有不必縣而縣者此蓋王進建言欲務為夸大以示外方意也以至增置人員添給俸祿無有虛歲彼所臨戶口曾不加多差稅轉成虛耗所謂十羊九牧為政大弊也今四海一家郡縣版籍何止數倍誇大之名將何所用不若依舊便將當省者省可併者併豈惟事簡官清不致國家緣虛名而受實費既省其官據祿薄者亦宜增

而厚之蓋清其吏而不厚其祿則飾詐而不廉知厚其祿而不省其官則財費而不足知省其官而不知選其能則事壅而不理此三者迭為表裏相須而成者也又江淮興兵以來諸道使府一切把軍官員權宜而置職及見設提舉司官及因聚賄妄立官府者多矣亦宜減削使職有常員事不煩冗則人無紛擾之勞矣

節費用

行券法省祇應

今訪聞得真定路週歲祇應錢萬有五千餘定以天下計之不下教萬定矣此緣省部差遣繁冗及當該官吏因之作弊致費用如此

之廣雖禁約關防甚悉不若澄治本根今後若路官得人凡事公幹并將急遞舖整點如法據行下事務嚴立程限管得時刻不悞如是則不必使者旁午而重費館穀也若軍國大事必須差官者照依前金給付券頭據合得分例令於上批寫某日經過某日宿頓回日繳納年終將報到祇應文冊查照同否多取並多與者同罪將見使人不敢多取掌行者不能妄添稍有分毫差別誠為方今節省費用良法至於朝廷重使別議給與如此減省故不少矣

禁醞酒

一目今自真定路以南直至大河地方數千里自春至秋雨澤愆期旱暵成災致米麥踴貴無處糶買例

皆闕食百姓往往逃竄莫能禁戢有司誠宜多方計置救災卹民竊見民間醞造秬酒所用米麥日費極多略舉真定一路在城每日蒸湯二百餘石一月計該六千餘石其他處所費比較可知若依至元十五年例將民間醞造秬酒權行禁止庶幾省減物斛以滋百姓實用誠救災息民之大事也

振武屯田

竊見每歲北邊於新城沙井靖州三倉和糶糧儲不下五七萬石如遇軍馬調遣又豈特十萬石而已近年穀價湧貴且以十萬石為率所費不貲用度終不寬廣兼自古饋餉雖有智者終無良法惟邊地屯營最為長算契勘唐憲宗元和七年李絳言天德

今豐州

振武左右良田約萬餘頃擇能吏可開置營田以省
費足食從之四年間開田四千八百頃牧粟四十萬
斛歲省度支錢二十餘萬緡今體訪得振武并豐州
界河兩旁地廣民稀除營帳牧放百姓耕墾外其餘
閒荒地甚多若差公幹官僚踏視其宜留兵營田一
切取武清屯例假以歲月自非水旱不熟田功稍集
國儲必有所濟故陸宣公云緣邊土沃而久荒所收
必厚如此費省足食官無規措和糴之勞民免輸納
虛耗之費恐亦安固邊防之一策也

納粟除監當官

竊見

上都北邊每歲

臨幸及屯戍重兵糴用糧斛甚廣雖官司和糴
商旅與販終是遠寫不能多廣得濟昔漢文景時亦
為艱于轉致令民輸粟塞下賜與爵級謂之賣爵級
遂致邊兵饒足方今院務官別不見入仕格例以曩
日論之不過貨賂請托若以弊革有益於

國家不若令辦課官驗額輕重使輸粟

上都及迤北州郡幾何者則任某處監當官一年立
為定制謂如某處務場周歲課額十定設官二員每
員輸米或粟

上都者若干迤北州郡者如此不半歲

上都及緣邊州郡便得米數十萬石豈不大便益哉
又如州府務官經營幹勾比得差遣所費不貲一任

之內必百方作計取償於民羨餘復入於已使明
損民力暗將官錢盡入私門若此法一行將見私錢
盡入公家則息奔競官革請托軍國坐收饒足之利
故令民輸粟充院務官最為當今良法
停不急之務

權停一切工役

竊見

大都雜役五臺拖木等夫及諸寺院營造比年以來
未嘗停輟古人有云工不使鬼必待人興財不天來
終湏地出不動百姓將何所求况今真定至大河迄
南年穀不登百姓嗷嗷倒皆乏食自採不暇據上項
工役似合權且停放以見

國家罷不急節浮費救災恤民至意

省罷鐵冶戶

竊見燕北燕南通設立鐵冶提舉司大小一十七處
約用煽煉人戶三萬有餘週歲可煽課鐵約一千六
百餘萬自至元十三年復立運司以來至今官為支
用本貨每歲約支三五百萬斤况此時供給邊用雖
所費浩大尚不能支絕為各處本貨積塚數多其窺
利之人用官司氣力收買其價不及一半當時既是
設立提舉司煽煉本貨以備支持除支外止合存留
積塚以備緩急今來却行盡數發賣竊詳此事虧官
損民深為未便今來止合依驗舊日有名曾煽爐座
存留三五處依例興煽據煽到本貨除支持外盡數

存留積塚並不許發賣外據近年新添去處悉行停
罷將所占百姓分撥所屬州縣依例當差仍許諸人
認辦課額興煽小爐或抽分本貨或認辦鈔數臨時
定奪如綦陽鐵官中統二年
省部已曾將冶戶差發比較歲煉鐵貨數甚爭懸以
此罷去其便與否乞追照元卷備見其詳
侵奪民利不便等事

課程再不添額

契勘課程自四十年前天下正額止萬有餘定今者
從萬至於十倍可謂極致每歲考較尚有增餘前省
定奪歲歲添作正額且財不天來皆自民出恐亦因
人之一節也兼商稅金貨物貨湊集買賣多寡市肆

遷移皆趨州郡會合津要去處歲各不常若累累一
體添答恐有輕重不等之弊可依已定額數外從實
振辦或依相承法增籌者量皆遷賞否者黜罰停歇
暮年告叙所增等第以五十定為上三十定為中二
十定為下如此民喜額定而不增官樂有功而陞用
羨餘之數自然盡實入官

論鈔法

竊見元寶交鈔民間流轉不為澁滯但物重鈔輕謂
如今用一貫總當往日一百其虛至此可謂極矣究
其所以法壞故也其事有四其至元十三年已後據
各處平準行用庫倒到金銀并元發下鈔本課銀節
次盡行起訖是自廢相權大法此致虛一也其鈔法

初立時將印到料鈔止是發下隨路庫司換易爛鈔以新行用外據一切差發課程內支使故即造有數儉而不溢得權其輕重令內外相制以通流錢法為本致鈔常艱得物必待鈔而行如此鈔寧得不重哉今則不然印造無算一切支度雖千萬定一於新印料鈔內支發可謂有出而無入也其無本鈔教民間既多而易得物因踴貴而難買此致虛二也又總庫行錢人等物未收成預先定買惟恐或者先取故視鈔輕易添買物重幣輕多此之由此致虛三也又外路行用庫令庫子人等私下倒易多取工墨以圖利息百姓昏鈔到庫不得畫時回換民間必須行用故昏者轉昏爛者愈爛流轉既難遂分作等級其買

等除

搭價然後肯接此致虛四

也今謂救其虛莫若用銀收鈔大路止用得課銀一餘定小處一二百定民間鈔儉必須將銀赴庫倒換鈔貨是鈔自如重銀復歸于官矣今却以鈔回則愈致于虛矣何是又官只重銀不重其鈔此復致虛一也或更造銀鈔以一伯當元寶二伯遞漸收見鈔蓋事久則變變則通輕重相濟之法也不然利病又當問中統元議立法者如張介夫王紹明等講明舊法以定新行如此年載間庶可復舊使資財大柄常操於上權不移於下矣

論鹽法

竊詳調度鹽法以便民為心者莫若於所轄州縣量

戶數多寡將元認課額均分依已定價錢一十四兩一錢仰各處管民官設立鹽官赴運司關支鹽貨置局發賣

納舊課關新鹽挨次送納其沿路脚錢於各處鹽局官用已錢出備却於發賣鹽價上搭帶仰各道按察司不時計點多餘之數

既分鹽課為正額聽從各處從實發賣中有此別路賣不盡去處督勒本處須管驗合關數目依限關支課亦依期送納何故當元驗民戶多寡均分食鹽之家既等緣何却有不盡數目防有私鹽生發仰各路正官提調不致阻滯正課亦不須設立巡鹽官擾民其先行賣訖去處必須再來關支是為增餘近年以

來人口增添食鹽既多別無虧失止有增羨可不勞而辦也

一官為調度者從

省部差有根脚慎行止諳錢穀人克規措所官聽運司節制於用糧去處設立許諸人赴倉送納或米或粟納獲朱鈔赴規措所關引支鹽近見運司官差規措官於南京等處不問人之貧富有無抵業九一抽分虛立文契指於某處中納糧斛其實將引到家不問價直高低貨賣了當或償舊債或納官錢或別作營至今五七年間錢糧不能到官者不可深計深為未便今者止合明出榜文召募諸人於所指倉分先行送納糧斛納獲朱鈔然後赴規措所支引次後來

關鹽釐勒監主毋得刁蹬停滯立便支發似此別無阻礙鹽法大行倉廩克實不須和糶和中豈小補哉一長蘆本處除收米粟外並不得收受諸物止收寶鈔赴萬億庫送納止收米粟者以備御河上下官為支持不收諸物者諸物官司無用中間作弊不無阻礙鹽法若以收鈔納鈔其便有三一則鈔法通快二則革去舊弊三則官民兩便

一便商賈為利者許諸人赴場買引關鹽釐勒監主不得刁蹬客旅最為急務蓋禁官吏不得買引賣引是也既許諸人與販官吏亦用已錢何故不可若使本管官吏得買其間客旅深為未便課程不能虧辦何故鹽價貴則官吏盡數拘買客旅不能得買鹽價

賤則官吏並不收買客旅謂曾赴倉場不能得買嘗被耽悞又知鹽價遲溢亦不與販虧損官庫皆此之由又官吏買鹽先揀離場近便去處次揀潔淨乾白好鹽又不依序先行揀支使客旅人等無所措手其弊不能一一徧舉切惟鹽場天下號為爭利之所况本管官吏乎蓋防微杜漸尚有不能禁者以官物為已有之資放縱由我不戒哉

一運司上下大小請俸人員近七百名其中虛設者大半行戶部都轉運司之名可易為提舉鹽使司大使副使各一員次以管勾催煎足以辦集自然官減俸省亦便利之一端也

一解州池鹽天然自成不同清滄犯本煎造費用浩

大往年陝西運司為課額重大立法頗峻山谷遠人不知禁忌食既艱得未免私煎胃販事發到官情罪不小往往有破家成生者良為可哀昔隋初罷酒坊通池鹽鹽井之利與民共之至今稱為仁政若於見定解鹽價直內更為減免分數使民易得食用亦國家惠民而不費之一端也

輝竹屬民

竊見衛輝路輝州園竹皆係百姓自來栽植置買物業軍站差徭仰之出備自善穀建言將頃畝官量見數斫伐四六相分民得六分官又拘取量給價直當時百姓已是不堪近年以來不依時月不問去留恣意斫伐盡行枯廢其合得價錢給既非時多不完備

又巡竹人等絡繹往來稍有疑似恐嚇錢物事非一端往往有破家失業者致百姓顧視竹植甚于仇讐切詳天之生物本以養人乃反為害豈造物意哉且量頃畝無多抽取四分以之輸官未為大益百姓得之實非小補合無將上項園竹依舊令民為主官不抽分出備一切差役氣力亦寬弛山澤之禁不奪民利之美事也若謂於干係官竹法有礙據輝竹造到器物令給引印烙亦可通行其見設提舉司並不將竹園糧蔣名為辦課轉以侵擾百姓營治已私為務亦宜罷去令總府就便管領其省官吏息民擾實為便當

分間官占民田

一總庫將東鹿縣民田以為官地約一千四百餘頃

每歲包納麥課每畝麩三斤合無除免明諭百姓使為永業

一去歲取勘到滑州

御麥地畝約八百餘頃中間多係軍站農民祖業莊產種養年深今來一例打入數內理合分間民田令依舊為主

定奪官地給民

一京兆路州郡所有營盤草地極廣舊為探馬赤牧馬地面近年遷往西州屯駐其悉為閒空地畝并隨路營盤草地空濶去處量給例近無田農民耕種併贖不足

禁約侵擾百姓

一每歲鷹房子南來所經州縣市井為空因官吏非理凌辱百姓畏之過於營馬及去又須打發撒花等物深為未便乞嚴行禁約以安吏民

一四萬戶軍馬遇有調度經過去處嚴加禁約不得非理騷擾致驚農民責所在達魯花赤巡護勾當但有失事坐所委官罪

一興州管內河西軍戶間處村落不時騷擾如強耕田白采桑欺凌農民等事告發到官司縣不能追理至元十七年

省院已曾差官究治此其顯然也合行嚴切禁約不致別有侵漁

一隨處監官非奉

上司文移不得一面將門攤定課額上擅行添搭數目一御河上下一切官司阻礙客旅舡隻不能通快如開關錢漫河索岸例等事乞悉行禁約

秋澗先生大全文集卷第九十

秋澗先生大全文集卷第九十一

事狀

翰林院不當以資例取人

竊惟人材不出政事文章而已政事但曾諳練尚可勉為至於文章自非天材有學者不可強為今翰林職掌人等樂其安簡占處名位守以歲月以次而遷有從書寫至修撰待制者今後合無從本院精人材之選為勾當不宜循遷以塞賢路

定奪黃河退灘地

一黃河兩岸多有退灘閒地有

塔察大王位下頭目冒占作投下稻田令側近農民寫立種佃官文字每歲出納租課自餘不得開耕竊

上司文移不得一面將門攤定課額上擅行添搭數目一御河上下一切官司阻礙客旅舡隻不能通快如開關錢漫河索岸例等事乞悉行禁約

秋澗先生大全文集卷第九十

秋澗先生大全文集卷第九十一

事狀

翰林院不當以資例取人

竊惟人材不出政事文章而已政事但曾諳練尚可勉為至於文章自非天材有學者不可強為今翰林職掌人等樂其安簡占處名位守以歲月以次而遷有從書寫至修撰待制者今後合無從本院精人材之選為勾當不宜循遷以塞賢路

定奪黃河退灘地

一黃河兩岸多有退灘閒地有

塔察大王位下頭目冒占作投下稻田令側近農民寫立種佃官文字每歲出納租課自餘不得開耕竊

詳河水走臥不常今日河槽明日退灘安得為投下屬地今後合無將一切退灘地面許令諸人開耕種蔣實為便益

舉耶律張商焦四相事狀

一竊見前中書左丞相耶律鑄中書左丞張文潛前安西王府王相商挺秘書監焦仲益皆係朝廷勲德天下重望方今之務親賢為急比之求訪疎遠如四相者識達政體綜練時宜若使之恭預大政必能裨補缺漏有所廣益傳稱圖任舊人共政此之謂也

復許諾人陳言

一中統元年許諾人陳言當時主意不為徒然蓋一

則舉知羣下休戚之情二則視時政得失之弊三則見人材可用之實今政務方殷惟慮廣求直言採議得失今後合無復許諾人陳言內設詳定奪等官使掌其事

舉明宣慰胡祗通事狀

竊見前荆湖路副使宣慰胡祗通自中統元年至今揚歷中外二十餘年所至皆以能稱其識時應務通方有為求之時輦不可多得誠經濟之良材時務之俊傑也內外劇職皆可迭居今居閒日久理合起復以應清朝之選乃天下公論非卑職之所得私也

議司獄官

竊見隨路所設司獄官致恤囚徒最為切務蓋使暮

夜不致疎虞寒暑周令失所飲食以時醫藥無缺此緣當罪不使苦楚無聊損傷人命此其職也近年多以年老無能之人使充其任至獄事狼籍囚繫失所是與不設等爾若選得如往年大都路司獄劉彥祿十數人使之盡心獄事或今後應重囚未斷非理獄死者治司獄等罪如此庶仰副朝廷哀矜庶獄之本意也

禁約興利無效等人

竊見近年開挑淄萊路石河致死損夫役甚衆終不能成事竊詳若輩妄開利孔明知無成萬一有效功歸一已不成害及衆人所諷之家其將何罪山東之民至今咨怨今後若復有如此妄言僥倖之者宜嚴

行禁約如見役興工者將來無驗合無量事重輕究治庶免傷財害民之悔又安知非姦人之計可不審慎之哉

議大名券軍

竊見大名見屯生券軍一萬二千餘人不及三年所費錢糧至甚浩大米一十萬石鈔七萬餘定若上司近前別無驅用且同往年熟券軍發還南中使分隸諸翼以備邊防其中若有年老者放還為民不

理財事狀

即今包銀課程茶鹽之數歲入不貲用度不患缺少所當更張者在于一切管掌之人染漬舊習中間多

總三萬大名一萬五千
衛輝路五千太原五千

方格取盡入私門官不得用民實受敝使
國家虛受重利之名切要立法革弊使民力蘇息取
之不致困乏

馬政事狀

切謂三軍之本以馬為先今遇有用度不免和買拘
刷和買官吏作弊拘刷則遠駭觀聽乞請於塞垣水
草宜收之地分立羣牧使通政院專掌其事

預備事狀

除有司常例支持外振武屯田輸粟補官最為上策
易稱君子儲戎器以備不虞兼預備則造作如法犀
利可用是錯謂甲不能禦矢與無甲同矢不能入堅
與無矢同可不重慎今後合無將隨路常課再行整

點督勒使成造如法於上書寫官匠姓名以考其程
於所須去處起庫收貯如是庶得造作如法不致臨
時併造多不如法朽鈍不堪用度

為審斷罪內事狀

竊見隨路淹禁罪囚極多

省部自從以來遠踰半歲今追銀者有人填撫者有
官檢災亡者有使未聞曾差一官審理罪囚者古人
稱遭遇旱災多緣刑獄淹延所致即目已是秋分乞
精選精詳官員曉知刑名者同按察司官分路前去
審錄歸斷一切獄囚恐亦感召和氣之一端又使百
姓具知

省部不獨於錢穀留意也

為革部符聽偏辭下斷事狀

竊見

部吏符文之弊謂如甲以田宅告部便以偏辭有理斷付甲主乙復上訴新吏不照先行却以乙辭有理即付乙主路官知其徇弊欲從理長者歸結二人各倚元符互相不服其兩造或赴察司陳告照卷明見亦欲與之改正又緣

省例部斷者不許輒改以致耽悞有累年經歲不能杜絕者乞請

上司定奪歸一毋令止憑偏辭輒下斷語庶免人難

開種兩淮地土事狀

一竊見黃河迤南大江迤北漢水東西兩淮地面係

在前南北邊徼中間閒歇歲久高肥有餘雖有居民耕種甚是稀少宜設立大司農司招集大江南北無產業人民驗丁力標撥頃畝令一定住坐為主官給牛隻農具差稅並不取要若成就後別議定奪如此不數年間開耕作熟貧民既得濟虛地又行內實萬一緩急以食以兵皆可倚用

祝香百門山神事狀

一糶米準差者二千和買又不下二三千石又淇水係是

御河上源一切漕運供給 大都甚有功用此之濟瀆及物濟國潤民之功非細據上源水神似宜特降香火以答神休

司官不勝任者即行奏代事狀

照得

條畫內一款按察官聲迹不好者即行奏代今南北
察司廿道每司正官與首領人員除新任未滿者是
遷調員數常幾于半材不易知安得人人而當之然
即其所知於初選時稱停搭配不致偏重可也其已
除而不勝者若姑息待滿是知其無能令徒占位次
月費俸料養資歷而已於司事何益乞請令監察上
下半年巡行督察之歲取其功罪之尤者明著之以
示天下不次陞黜一二人所謂臺諫急則監司警監
司警則郡縣肅誠激勸賢否振勵衰弊之一法也

精選首領官員事狀

近年憲司首領官多取自雜流有案牘文墨絕不通
曉者其懦者備員素餐強者挾私害公紊亂官府若
今後止於見任州縣八品七品職官內選兼該儒吏
通曉世務風采人望出總幕之右者使克可也且憲
司職雖糾彈其體面全是禮法二者為用不同管民
叅佐衝撞辦集為能若必其取強梁跋扈務尚口吻
者是無良之人假其重勢使之行私耳伏乞詳思以
存大體

添書吏奏差人員祿食資歷事狀

竊見案察司書吏奏差人員據照掌文案糾察等事
其品雖微其職甚要今百物踴貴俸稍不足以育廉
賢愚混淆資叙不足以激勸循名責實似有所難惟

其養之厚故可責之重乞請將祿食資歷再行定奪
稍得加重久則人自為勸若責罰出退其將何辭

關支俸錢事狀

竊見遷轉官吏例携幼扶老千里區區而就一官照
得十八年正月內

朝廷令州縣依舊與俸却為各處官無見在至今有
未關支者是

國家露恩如常而州縣不蒙均惠方餬口不贍而責
曰爾無貪吾有法豈理也哉今後乞請將隨路百姓
納到俸錢另行收貯專以按月支付庶幾官吏日得
養廉易於責辦

罷孫招討戶

一孫招討戶自都督史權鎮鄧州時投拜約八百餘
戶名之曰射生戶即目散處襄鄧西山一帶合行分
屬所在州郡為民當差不致別生事端

罷南陽屯田戶

一南陽府屯田三千戶往年亦曾言其當罷其後
省差官與河南宣慰司一同前往屯所勘當定奪其
本管官見戶齊斂鈔四兩打發來官以此却言不罷
便至今依前屯種理合罷散兼南陽縣民談驛程在
城見管當差戶止十餘戶遇有一切遞轉差役委不
能當若將上項屯田戶放還為民甚為便當

罷規運硝減山楂等官

一隨處見立規運所硝減局并河泊山楂山場等官

侵漁百姓其害非一謂如一切販買山貨等物其賣主已有認辦課程買主赴務起稅及其貨賣又行依例商稅今來山植等官鎖關山路或半道巡捉更行驗物抽分至於來自他所經過地方不憑關引取要錢物稍涉疑似監收鎖索百方侵擾竊詳山野小民資本輕微仰之經營以供一切差役今者有此重併實不聊生所立州府為上司設置辦課衙門坐視亂行又不敢問致內負既屈控告無所據上項一切創立局司侵奪民利等事理合革罷以慰民心

定奪儒戶差發

照得丁酉年欽奉

聖旨節該中選儒生若種田者輸納地稅買賣者出納商稅開張門面營運者依行例供出差發其餘差發並行蠲免又照得中統二年欽奉

聖旨節該已前

聖旨裏如今咱每的

聖旨裏和尚也里可溫先生答失蠻體例裏漢兒人河西秀才每不棟甚麼差發休着秀才的功業習者欽此至元十三年蒙

上司差官試驗分棟元籍除差儒人該試中儒人內兩丁近下戶計撥充太常寺禮樂戶竊見試中儒人戶內多有戶下餘丁不曾就試官司收係當差又有因故不及就試儒人亦行全戶收差若蒙

將元籍試中儒人戶下餘丁不魯就試戶計照依
丁酉年試驗儒人

聖旨體例全免本戶差發外及因故不及就試儒戶
乞差官再行試驗試中者依例免差黜落者收係
當差實為受賜外有至元八年欽奉

聖旨保勘到委通文學續報倚差儒人於至元十三
年亦行就試中選若蒙依例除差以為後勸

薦前御史康天英狀

早膺劇任備見長材當官有通變之方持論熟經事
之慮考據實迹委號良能如憲臺初立首以材望擢
拜御史繼授南京幕職時攻取襄樊本官支持餽運
務繁益辦若以材能可以從政八路之間少見其比

自秩滿居閒恬於仕進于今四年抱用未伸中外嘆
惜伏惟

聖朝方致理有為之秋如天英者不宜使才德空老
田間以遺明時之用理合舉明以激貪鄙

保郝彩麟狀

竊見故翰林侍讀學士 國信使郝經奉使亡宋幽
囚十有六年以沉鬱致疾還朝未幾隨即物故據以
勞死事誠當優恤其家今嗣子彩麟年長負學卓有
所立似宜超等擢用以酬父勞且為立功立事者之勸

申明宣慰使陳祐狀

蓋聞忠義者天下之大閑聖王常推而褒之所以砥
礪生民為當世不忠者之勸竊見故中奉大夫浙東

道宣慰使陳祐歷事

兩朝家無僭石迹其為官舉皆善政生而竭匡濟之忠歿而有砥礪之效孤身遇寇無路可生奮然不去為國扞賊甘心白刃正色就死雖李司徒之握節死事顏魯公之抗志捐軀無以過也至使越之鄙民感愴忠節萬口一辭願留葬會稽世奉其祀自非精誠動貫微動一時何能致此其於助世教厲薄俗豈小補哉况忠義者

國家之元氣所宜養而不可衰也今本官淪忠泉壤不蒙顯異切為

朝廷惜焉伏惟哀憐推而褒之不惟於贈典殊常將見伏羲守節之臣自茲為不少矣嗣子夔今為福建

路行軍千戶蓋出

特旨不由門資次子夔未仕通文學有孝行如錄之從政必有可稱亦旌顯之一端也

修理大都南京石經事狀

三聖人之教其揆則一尊其師重其教此理之當然也竊見

大都南京廟學所有九經石刻刊琢極精近年以來舊制既廢舉皆散落于荒烟草棘間日就摧圯甚可寶惜且經之遺制自漢唐至今歷代

聖王無不尊崇修理蓋重夫經世大法故也今海宇混一方息馬論道之時據上項石經理合修立以彰國容兼所費不過夫匠灰石而已只係有司一言力耳

論黃河利害事狀

夫古人作事慮未然不治已然治未然用力少而收功多况預備不虞古之善教也河為中國經濟遷徙不常自古為患非小川細流可比竊見今夏自中堡村南卧去京城廿里而近撞圍水三百餘步勢湍悍舊築月堤一蕩而盡又自河抵京北郊地勢漸下南北爭懸七尺之上中間土脉疏惡素無堤防固護以悍水衝又見犯去處不下五六十步南接陳橋六丈故溝至甚寬浚北勢既高水性趨下斷無北泛之理故識者云已隱犯京之勢似非過論也若向前霖潦大至瀑汎之際意欲所之崩摧潰決其害有不可勝言者每歲有司規畫不過今夏役夫數千明年興工

半萬縷水築堤以應一時極其所至僅能防備滄水終非緩急可恃得濟之用但幸其不為蓄耳况大梁自古雄鎮今又為江淮總會要津日當修理不可任河作祟視為尋常萬一侵犯豈惟使民居蕩析且廢通漕控制之利民之大命又所係有重焉者蓋開封祥符陳留通許等數縣之地耕種不下數萬餘頃若漫為淀澱歲計先失民何以生此最可慮也又聞往年兩次南犯酸棗陳橋二門止是支流水小京尹悉吉禿滿行省崔斌等極力堵閉幾不能塞况今大河正流直指南卧常人尚慮將漸為患而增卑培薄分流殺勢之議其可後哉今體訪得河自臺頭寺西東接杞縣西界兩勢平無槽岸行流虛壤中故卧南卧

北大勢走作所以漸為京城害者不出此百里間而已若能舍小就大廣為規制如亡金新衛所修石岸者遮障奔衝使東過三汊散為巨浸可毋慮也當職竊詳每歲興工築隄防捍真成戲劇恐徒費人工損踐民田其為可防經久之事曾無少補如蒙以國家大計論之河防之議其說甚多合行重為講究方來利害舍小就大廣為規制以圖一勞永逸之舉實為便當不然據要害去處建立祠廟專使以重禮禱祭仰賴

洪麻庶回神眷使河有定流不致傷財動衆亦揀災穰福之一端也

秋澗先生大全文集卷第九十一

秋澗先生大全文集卷第九十二

事狀

郊祀園丘配享

祖宗事狀

臣謹言伏念我

國家列聖相承奄有天下六十餘載今海宇一統自堯舜漢唐以來未有如此之盛茲蓋

陛下神聖天縱孝治日隆以不世出大有為之資臨御有道故也然所有未舉大典在臣子分禮宜建言所謂方今大典郊祀是也何則孝莫大于嚴父嚴父莫大于配天自堯舜以來至于金宋上下二十餘代之間莫不郊祭天地及五方帝神以配

北大勢走作所以漸為京城害者不出此百里間而已若能舍小就大廣為規制如亡金新衛所修石岸者遮障奔衝使東過三汊散為巨浸可毋慮也當職竊詳每歲興工築隄防捍真成戲劇恐徒費人工損踐民田其為可防經久之事曾無少補如蒙以國家大計論之河防之議其說甚多合行重為講究方來利害舍小就大廣為規制以圖一勞永逸之舉實為便當不然據要害去處建立祠廟專使以重禮禱祭仰賴

洪麻庶回神眷使河有定流不致傷財動衆亦揀災禳福之一端也

秋澗先生大全文集卷第九十一

秋澗先生大全文集卷第九十二

事狀

郊祀園丘配享

祖宗事狀

臣謹言伏念我

國家列聖相承奄有天下六十餘載今海宇一統自堯舜漢唐以來未有如此之盛茲蓋

陛下神聖天縱孝治日隆以不世出大有為之資臨御有道故也然所有未舉大典在臣子分禮宜建言所謂方今大典郊祀是也何則孝莫大于嚴父嚴父莫大于配天自堯舜以來至于金宋上下二十餘代之間莫不郊祭天地及五方帝神以配

父祖蓋尊之至也

祖宗之聖重熙累洽郊祀之事未暨舉行者緣禮文弗備有不遑及者今

陛下即位二十餘年功成治定昭事天地尊禮百神略無虛歲若大禮一行得成秩之位合禘於圜丘豈不大通神明降福穰穰者乎又念自古偏方小國尚皆力行尊顯祖宗以為天地百神之主恭惟

陛下大廕護助際海內外盡付所覆而上帝簡在陛下之心又大可見矣不於此時報本顯祖以答天休其於繼繼承承之道終為曠闕兼舊有典章自金章宗一行之後湮沒遺逸不絕如縷即今就有三二老儒并收拾到亡宋典冊講究張皇一旦有成將萬

倍於尋常使

陛下垂旒被袞對越上帝與三五同功並接數千歲之統於上新萬方耳目於下使王道明而墜典與天地察而上下順

聖政聖教不待嚴肅以成以治所謂聖人作而萬物觀也豈不盛哉由是而觀自古聖帝明王續承先業所任之責未有重於此者故傳曰國之大祀在祀與戎惟 陛下裁察

鈞州建先廟事狀

蓋聞益廣宗廟大孝之本欽惟

太上憲宗皇帝雖

聖靈在天而神功武烈見於郡國者固當昭布遠暢

以盡中外臣民之敬今河南鈞州係
先太上皇帝王業祈基戰勝龍興之地蓄靈擁休赫
焉斯在宜營建原廟俾親王歲奉嚴禋以彰
聖德光昭造邦之本誠
嗣天子顯揚
祖宗之至孝也

牒司為中丞王通議病愈狀

竊見前行臺中丞王通議去歲春自揚州赴闕奏事
回偶患病疾百日作闕今過暮年已是平復即日居
家讀書以教子為事其於己私似為便安若以方今
選用人材之切如王通議者才術德望理合起復未
宜投置散地若不舉明伏慮憲臺未知久遺錄問

保士人杜之材賈宗傳狀

竊見新鄉縣布衣賈宗傳昨城縣中選儒士杜之材
二人性沉厚端亮有文辭而通世務讀書三十餘年
安貧守道以耕稼自給未嘗枉己妄有干進其於士
論畧無瑕玷誠丘園之秀民恬退之良士也今者幸
遭明時選材為急理合薦舉使拔出民間以備內外
之用必能行其所學不負所守以之振士氣而抑僥
風不謂於時無補

彈保定路總管侯守忠狀

檢會到中書省欽奉

聖旨定與提刑按察司條畫內一款節該所部內應
有違枉並聽糾察除欽遵外今體察得保定路總管

侯守忠粗魯無識凶暴有名恣意亂行略無忌憚不任以職猶恐敗羣重之以官凶焰何柰以致不遵朝省對抗使人詈辱同僚穢言肆口耽悞經賦縱而不征引帶私人結而成黨取能聲擅斷職官樹威風敗壞官府其吏民枉被凌暴者畏其凶惡不敢聲訴所望察司稍為柳按今又為阻壞如此中外嗟嘆莫不失叅詳本路近在都南實為要郡所轄一十五處軍民約十萬餘戶據根本內地首恩澤固民心非良吏莫可今使凶暴如此之人臨民辦事正猶以豺狼守羊無不傷之理據此合行糾彈

體復教授李龍輔狀

今體復得本官併與元保相同當職又觀其為人雅厚清純臨事通方有如修整廟學訓導生徒舉皆有法雖淹滯年深未嘗妄有干求所謂有德有能可以從政者也兼知得北京南京教授俱蒙遷調理合陞擢以激士風

舉楊德柔狀

竊見南京路錄事司軍戶楊德柔天姿秀穎不安于進累歷筦庫繼任本路照磨及與魯府提控案牘檢法等官俱有廉能之稱其為書學尤所精妙方今少見其比今名在兵籍常以家貧執役行間譬之象犀珠玉要以不宜混迹泥沙此士論之所共也卑職按巡河南見之廣座其學問行己並與所聞相同據此

合行保呈伏乞樞密院照詳施行

論王學士合陞承旨事狀

竊見翰林兼國史院承旨中奉大夫姚樞今已身故據本院翰林學士嘉議大夫王磐人品風節追配前賢議論文章發明聖學方崇儒重道之秋膺養老乞言之眷若陞授承旨職名以德以材實孚中外之望據此合行具陳中書省照詳施行

保舉提舉張從仕狀

竊見前棊陽鐵冶提舉司從仕郎同提舉張從仕賦性良明為人謹厚兼通儒吏歷仕年深掌財賦而藹廉潔之稱論刀筆而有裁遣之敏加之嫉邪處正識達時宜誠為有用之材皆係廉知之實理合薦舉以

俟陞擢

特選行省官事狀

竊見福建所轄八路一州四十八縣連山負海民情輕譎無常困苦者多其在邊隅實為重地存心撫馭尚慮失宜縱暴侵漁不無生事緣收附以來官吏以朝廷遠貪圖賄賂習以成風行省差擬職官又多冗雜擅科橫斂無所不至致政壞民踐草寇竊發指以為名下愚無聊因之蟻附其嘯聚去處附近貧民盡為剽掠內地軍興不免蹂踐中間雖有憲司糾治稍末尚艱所行其於根本有無如之何者甚非

朝廷包荒一視同仁之意求其治要無過得人為先

且府州司縣等官雖不能一一精擇據見闕
行省官僚如平章左丞二府名位特選素著清望簡
在帝心文足以撫綏遺黎武足以折衝外侮盡忠
祈事籌策有方不以利賄為心使剷除積弊矯正枉
濫肅清邊陲庶幾民安事靖日趨治域以之招諭則
彼心可服以之進兵則我直大信今賊之所以滋蔓
為梗者正以內缺官僚乘虛有名故也可不深計而
熟慮哉設或不爾雖濟濟布列上下相蒙以私害公
民之困敝猶焚火溺水日益深且熾矣得失之機實
係于此早職叨居風憲觀此其敢緘默自惜

論草寇鍾明亮事狀

竊見福建一道收附之後戶幾百萬黃華一變十去

其四今劇賊鍾明亮悍黠尤非華比未可視為尋常
草竊誠有當慮者今雖兩省一院併力收捕地皆溪
嶺囊橐其間出沒叵測東擊則西走西擊則東軼克
煽所及煽惑殺掠為害不淺招降則賊心不一攻圍
則兵力不敷又兼春氣動時兩行彼負固我持久恐
猝難成功似宜益兵力置總戎一節制追奔合圍勢
至窮蹙其將自斃惟復特差重臣宣示

恩詔招諭撫慰以安中外兩者之行庶幾必有一得
保醫儒胡璉狀

切見衛輝路醫儒胡璉資性詳明學術有素凡經治
療多獲痊安據本路見缺醫學教官若令璉補充勾
當教育諸生必有開益據此合行移牒請照驗施行

保儒生韓弘牒草

切見銜輝路錄事司後進儒生韓弘性溫雅有士行
素明經學兼習詞章嘗試以事論議容止舉皆可觀
據茲良碩宜備時用以勸後來今將本人所業文字
錄連在前合行移牒請照驗施行

論教官俸給事狀

竊念天下之事得其人則治不然雖有紀綱法制將
衰蕭而不振此必然之理學校者育材出治之本也
見承奉御史臺劄付談諸州府皆有受
勅教授仰免差儒戶內選餘閒子弟入學修習儒業
仍令各路正官朔望省視及按察司官選試行義修
明文筆優賧可以從政者然後解貢此誠為

國育材以備文武內外之用固非細務也却
教授多係老儒宿德白首一官不沾寸祿良可哀也
今欲修習之業旬省月視責有成效亦以難矣合無
照依

國子學醫學教官一體頒降俸給不然據見有學田
去處於每歲收到子粒內官為明定斗石月充廩給
以濟貧乏外無學田去處唯復別議定奪如此卹勸
庶幾官無虛設之名學有賓興之實將見文風蔚興
有不期然而然者矣

論開光濟兩河事狀 省議即從所議罷役

會驗近欽奉

詔書內節談自今以始煩民之事一切革去便民之